

No. 864.

AKTA UNIVERSITI DAN KOLEJ UNIVERSITI 1971

PERLEMBAGAAN UNIVERSITI MALAYA

STATUT UNIVERSITI MALAYA
(BADAN-BADAN PELAJAR) 2024

Pada menjalankan kuasa yang diberi oleh subseksyen 35(1) Perlembagaan Universiti Malaya, Canselor membuat Statut yang berikut:

BAHAGIAN I

PERMULAAN

1. Statut ini bolehlah dinamakan Statut Universiti Malaya (Badan-Badan Pelajar) 2024, dan hendaklah berkuat kuasa pada tarikh ia disiarkan dalam *Warta*.

2. Dalam Statut ini melainkan kandungan ayatnya menghendaki makna yang lain—

“Borang” ertinya Borang yang disediakan dan ditentukan oleh pihak berkuasa Universiti dari semasa ke semasa;

“Lembaga” ertinya Lembaga Pengarah Universiti Malaya;

“Naib Canselor” ertinya Naib Canselor Universiti Malaya;

“Pendaftar” ertinya Pendaftar Badan-badan Pelajar yang disebut dalam perenggan 16;

“Statut” termasuk Perlembagaan suatu badan pelajar sebagaimana yang ditentukan oleh Pihak Berkuasa Universiti;

“Timbalan Naib Canselor” ertinya Timbalan Naib Canselor yang menguruskan hal ehwal pelajar;

“Universiti” ertinya Universiti Malaya.

BAHAGIAN II

PENUBUHAN BADAN PELAJAR

3. (1) Jika sepuluh orang atau lebih daripada sepuluh orang pelajar Universiti berhasrat menubuhkan suatu badan pelajar yang terdiri daripada pelajar-pelajar Universiti bagi menggalakkan sesuatu tujuan atau kepentingan tertentu di dalam Universiti di bawah seksyen 58 Perlembagaan Universiti, mereka hendaklah mengemukakan permohonan kepada Naib Canselor melalui Timbalan Naib Canselor mengikut tatacara yang ditetapkan oleh Universiti.

(2) Perlembagaan sesuatu badan pelajar hendaklah seperti yang ditetapkan mengikut tatacara yang ditetapkan oleh Universiti.

4. (1) Apabila menerima sesuatu permohonan di bawah perenggan 3, Timbalan Naib Canselor boleh menubuhkan jawatankuasa yang hendaklah membuat segala siasatan yang difikirkannya perlu dan tanpa menyentuh keluasan kuasa-kuasanya berkenaan ini, ia boleh membuat siasatan berkaitan dengan perkara-perkara yang berikut—

- (a) sama ada tujuan atau kepentingan yang dicadangkan itu atau tujuan atau kepentingan yang seumpamanya sedang diperjuangkan oleh mana-mana badan pelajar yang sedia ada;
- (b) sama ada tujuan atau kepentingan yang dicadangkan itu cukup jelas dan khusus;
- (c) sama ada tujuan atau kepentingan yang dicadangkan itu akan digalakkan di dalam Universiti;
- (d) sama ada tujuan atau kepentingan yang dinyatakan itu pada hakikatnya adalah yang sebenarnya;
- (e) sama ada tujuan atau kepentingan yang dicadangkan itu akan berkaitan dan berfaedah kepada kemajuan yang wajar bagi ahli- ahlinya berhubung dengan kehidupan akademik mereka atau dengan perkembangan sahsiah yang sempurna;
- (f) sama ada badan pelajar yang dicadangkan itu boleh bergerak di kalangan dan mendapat ahli-ahli dan sokongan daripada sebilangan besar pelajar-pelajar yang berkaitan dengan tujuan atau kepentingan yang dicadangkan itu;
- (g) sama ada kelayakan-kelayakan yang dicadangkan bagi ahli-ahli adalah adil, munasabah, berkaitan dengan tujuan atau kepentingan yang dicadangkan, dan tidak mengecualikan mana-mana kategori pelajar-pelajar yang berkaitan dengan tujuan atau kepentingan tersebut atau memasukkan mereka yang tidak berkaitan dengannya;
- (h) sama ada aktiviti-aktiviti yang akan diperjuangkan oleh badan pelajar yang dicadangkan itu akan mendatangkan mudarat kepada kepentingan pelajar, atau mana-mana golongan pelajar, atau kepentingan Universiti;
- (i) sama ada pemohon-pemohon mempunyai atau mungkin mempunyai kepentingan-kepentingan atau ikatan-ikatan yang mendatangkan mudarat kepada keselamatan, ketenteraman atau tatatertib; dan
- (j) anggaran perbelanjaan yang akan dilakukan oleh Universiti untuk menubuh dan menguruskan badan pelajar yang dicadangkan itu.

(2) Timbalan Naib Canselor boleh, jika difikirkannya perlu:

- (a) menemuduga mana-mana pemohon atau mana-mana pelajar lain; dan
- (b) meminta pemohon atau mana-mana pelajar tersebut memberi apa-apa maklumat tentang keperluan penubuhan badan pelajar tersebut dan tentang kemampuannya untuk bergerak maju.

5. (1) Apabila Timbalan Naib Canselor telah selesai membuat siasatannya di bawah perenggan 4, beliau hendaklah mengemukakan permohonan itu kepada Naib Canselor bersama dengan satu laporan mengenai siasatan yang telah dibuat dan syor-syor berkenaan dengan penubuhan badan pelajar itu.

(2) Syor-syor Timbalan Naib Canselor di bawah perenggan ini boleh termasuk suatu cadangan—

- (a) supaya suatu badan pelajar dengan nama yang lain daripada yang dicadangkan ditubuhkan oleh pemohon-pemohon;
- (b) supaya tujuan atau kepentingan yang dicadangkan bagi badan pelajar itu atau kelayakan bagi ahli-ahlinya diubah suai; atau
- (c) supaya penubuhan badan pelajar itu diluluskan tertakluk kepada had-had dan syarat-syarat.

6. Naib Canselor boleh, sebelum membuat keputusan mengenai sesuatu permohonan yang dikemukakan kepadanya di bawah perenggan 5, mengembalikan semula permohonan itu kepada Timbalan Naib Canselor untuk:

- (a) membuat siasatan lanjut; dan
- (b) mengemukakan laporan lanjut sama ada secara am atau mengenai perkara-perkara tertentu, sebagaimana difikirkan patut oleh Naib Canselor.

7. (1) Jika Naib Canselor meluluskan permohonan tersebut, beliau boleh meluluskannya tertakluk kepada apa-apa had dan syarat yang difikirkannya patut.

(2) Dalam meluluskan sesuatu permohonan di bawah subperenggan (1), Naib Canselor boleh menetapkan penubuhan badan pelajar tersebut bersifat sementara sahaja dan hanya akan disahkan apabila Timbalan Naib Canselor melaporkan kepada Naib Canselor dalam suatu tempoh yang ditetapkan bahawa beliau berpuas hati yang sebilangan pelajar yang memadai berkaitan dengan tujuan atau kepentingan khusus yang ingin dimajukan oleh badan pelajar itu telah menjadi ahlinya.

(3) Pada meluluskan permohonan tersebut, Naib Canselor hendaklah menentukan tarikh mula berkuatkuasanya penubuhan badan pelajar itu.

8. Naib Canselor hendaklah menyampaikan keputusannya kepada Timbalan Naib Canselor yang hendaklah pula menyampaikan keputusan tersebut kepada pemohon secara bertulis.

9. (1) Apabila diberitahu mengenai kelulusan Naib Canselor tentang permohonan tersebut, pemohon-pemohon, yang mana hendaklah disifatkan sebagai ahli-ahli pertama badan pelajar itu, hendaklah menetapkan tarikh mesyuarat untuk memilih pemegang-pemegang jawatannya yang pertama, iaitu Yang Dipertua, Naib Yang Dipertua, Setiausaha dan Bendahari, dan lain-lain pemegang jawatan yang dibenarkan secara bertulis oleh Naib Canselor.

(2) Pendaftar hendaklah hadir dalam mesyuarat yang disebut dalam subperenggan (1) dan mengawasinya.

BAHAGIAN III

PENTADBIRAN

10. Naib Canselor boleh dari semasa ke semasa meminta Timbalan Naib Canselor memberi kepadanya apa-apa maklumat yang dikehendakinya mengenai mana-mana badan pelajar.

11.(1) Timbalan Naib Canselor boleh dari semasa ke semasa sama ada atas inisiatifnya sendiri atau atas permintaan Naib Canselor mengarahkan;

- (a) badan pelajar, atau mana-mana pemegang jawatan;
- (b) mana-mana ahli badan pelajar; atau
- (c) mana-mana ahli jawatankuasa *ad hoc* badan pelajar,

memberikan apa-apa maklumat yang dikehendakinya dalam tempoh yang ditetapkan atau seberapa segera yang praktik.

12.(1) Timbalan Naib Canselor boleh menghendaki:

- (a) mana-mana pemegang jawatan;
- (b) ahli badan pelajar;
- (c) mana-mana jawatankuasa *ad hoc*; atau
- (d) mana-mana pelajar lain,

hadir di hadapannya pada tarikh, masa dan di tempat yang ditetapkan untuk menjawab apa-apa pertanyaan mengenai badan pelajar itu.

13.(1) Timbalan Naib Canselor boleh menghendaki mana-mana:

- (a) pemegang jawatan;

- (b) ahli badan pelajar;
- (c) mana-mana jawatankuasa *ad hoc*; atau
- (d) mana-mana pelajar lain

supaya hadir dan/atau mengemukakan kepadanya:

- (i) apa-apa minit;
- (ii) buku;
- (iii) akaun;
- (iv) rekod;
- (v) barang atau harta,

yang disenggara, digunakan atau disimpan oleh, atau secara lain berkaitan dengan hal ehwal, badan pelajar, Majlis Eksekutif badan pelajar, atau jawatankuasa *ad hoc* badan pelajar.

(2) Timbalan Naib Canselor juga boleh menguruskan dokumen-dokumen, barang atau harta seperti yang dinyatakan di subperenggan 13(1)(i) hingga (v) dengan apa-apa cara yang difikirkannya patut, atau memberi apa-apa petunjuk atau arahan yang difikirkannya perlu.

14. Bagi maksud Statut ini, Naib Canselor, Timbalan Naib Canselor atau Pendaftar boleh dari semasa ke semasa meminta sesuatu badan pelajar, Majlis Eksekutifnya, mana-mana jawatankuasa *ad hoc*nya, mana-mana pemegang jawatan atau ahli badan pelajar bertindak atas sesuatu, atau memberi apa-apa arahan atau petunjuk kepadanya sebagaimana yang difikirkan perlu.

Pembubaran atau Penggantungan

15.(1) Naib Canselor boleh mengarahkan supaya suatu badan pelajar tersebut dibubarkan atau digantungkan sama ada dengan serta merta atau mulai dari suatu tarikh yang ditentukan oleh Naib Canselor, jika Naib Canselor berpuas hati bahawa:

- (a) penerusan badan pelajar tersebut adalah bukan untuk kepentingan ahli-ahli badan pelajar, pelajar-pelajar Universiti atau Universiti;
- (b) sesuatu badan pelajar telah gagal mendapat dan mengekalkan keanggotaan yang dinyatakan di bawah Statut ini atau syarat-syarat kelulusan penubuhannya berkaitan keanggotaan minima yang telah ditetapkan oleh Naib Canselor;
- (c) sesuatu badan pelajar telah tidak begitu aktif dalam memajukan tujuan atau kepentingannya;

- (d) sesuatu badan pelajar telah menyeleweng daripada tujuan atau kepentingannya yang telah ditentukan; atau
- (e) sesuatu badan pelajar telah—
 - (i) melanggar; atau
 - (ii) bertanggungjawab atas atau menjadi pendorong dalam, atau dengan apa-apa cara membantu dalam pelanggaran

mana-mana peruntukan Akta Universiti dan Kolej Universiti 1971, Perlembagaan Universiti, Statut ini, Perlembagaannya, statut-statut, kaedah-kaedah, peraturan-peraturan atau mana-mana undang-undang bertulis lain, sama ada berkaitan dengan Universiti atau selainnya.

(2) Jika Naib Canselor mengarahkan pembubaran atau penggantungan sesuatu badan pelajar di bawah subperenggan (1), beliau boleh memberi apa-apa arahan berbangkit yang difikirkannya perlu.

(3) Peruntukan subperenggan (1) dan (2) tidak boleh ditafsirkan sebagai mengurangkan kuasa peruntukan-peruntukan seksyen 16 Akta Universiti dan Kolej Universiti 1971 dan seksyen 59 Perlembagaan Universiti.

(4) Sekurang-kurangnya satu pertiga (1/3) daripada bilangan ahli sesuatu badan pelajar boleh memberitahu Pendaftar secara notis bertulis dengan disalinkan kepada Setiausaha badan pelajar itu, bahawa mereka berkehendakkan badan pelajar yang mereka anggotai itu dibubarkan.

(5) Apabila Pendaftar menerima notis bertulis di bawah subperenggan (4), Pendaftar boleh, selepas menjalankan penyiasatan yang difikirkannya patut memanggil suatu mesyuarat agung bagi badan pelajar tersebut dengan memberi notis bertulis tidak kurang daripada sepuluh (10) hari kepada ahli-ahlinya, untuk memutuskan sama ada badan pelajar itu boleh dibubarkan. Jika diputuskan di dalam mesyuarat agung tersebut supaya badan pelajar itu dibubarkan, badan pelajar itu hendaklah terbubar mulai dari tarikh yang diputuskan oleh mesyuarat agung tersebut.

(6) Pendaftar hendaklah hadir dan mengawasi mesyuarat agung yang dipanggil olehnya di bawah subperenggan (4).

(7) Jika sesuatu badan pelajar dibubarkan di bawah subperenggan (5), Pendaftar hendaklah memberitahu Naib Canselor mengenainya.

BAHAGIAN IV

PENDAFTARAN DAN REKOD

16.(1) Maka hendaklah ada seorang Pendaftar Badan-badan Pelajar yang terdiri daripada seorang pegawai sepenuh masa Universiti dan mempunyai kuasa-kuasa dan tugas-tugas yang ditentukan dalam Statut ini atau, dari semasa ke semasa, diarahkan oleh Timbalan Naib Canselor atau Naib Canselor.

(2) Naib Canselor boleh jika difikirkannya sesuai, menamakan Pendaftar, seorang Timbalan Pendaftar, atau seorang Penolong Pendaftar Universiti sebagai Pendaftar Badan-badan Pelajar.

17. Pendaftar hendaklah bertanggungjawab kepada Timbalan Naib Canselor dan menjalankan kuasa-kuasanya, melaksanakan fungsi-fungsinya dan menyempurnakan tugas-tugasnya di bawah arahan dan pengawasan Timbalan Naib Canselor.

18. Pendaftar hendaklah menyenggara satu daftar badan-badan pelajar mengikut tatacara yang ditetapkan oleh Universiti.

19. Apabila permohonan untuk menubuhkan suatu badan pelajar diluluskan oleh Naib Canselor, Pendaftar hendaklah mengeluarkan kepada badan pelajar itu satu Sijil Pendaftaran mengikut tatacara yang ditetapkan oleh Universiti.

20. (1) Apabila sesuatu badan pelajar dibubarkan, Pendaftar hendaklah mengeluarkan satu Sijil Pembubaran bagi badan pelajar tersebut.

(2) Sijil tersebut hendaklah diumumkan dalam kampus dengan cara yang difikirkan patut oleh Pendaftar.

21. (1) Setiap pelajar yang memohon untuk menjadi ahli sesuatu badan pelajar hendaklah menghantar permohonannya kepada Setiausaha badan pelajar itu dan disalinkan kepada Pendaftar.

(2) Sesuatu permohonan untuk menjadi ahli sesuatu badan pelajar hendaklah dipertimbangkan oleh Majlis Eksekutif badan pelajar itu, dan Setiausaha badan pelajar itu hendaklah memberitahu pelajar tersebut berhubung keputusan Majlis Eksekutif, dan hendaklah disalinkan kepada Pendaftar.

(3) Jika terdapat sebarang perubahan berhubung butir-butir seseorang ahli badan pelajar, ahli itu hendaklah memaklumkan secara bertulis berhubung perubahan tersebut kepada Setiausaha badan pelajar dan disalinkan kepada Pendaftar.

22. Jika terdapat sebarang perubahan berhubung aktiviti badan pelajar atau perkara-perkara lain yang berkaitan dengan badan pelajar, Majlis Eksekutif badan pelajar itu hendaklah memaklumkan secara bertulis berhubung perubahan tersebut kepada Setiausaha badan pelajar dan hendaklah disalinkan kepada Pendaftar.

23. Setiausaha sesuatu badan pelajar hendaklah memberitahu Pendaftar secara bertulis tentang pemilihan, perletakan jawatan, pemecatan atau kehilangan kelayakan seseorang pemegang jawatan badan pelajar dalam masa satu minggu selepas pemilihan, perletakan jawatan, pemecatan atau kehilangan kelayakan itu.

24. Seseorang pemegang jawatan atau ahli sesuatu badan pelajar atau mana-mana jawatankuasa *ad hoc*nya boleh pada bila-bila masa meletakkan jawatan atau keanggotaannya dengan notis secara bertulis kepada Setiausaha badan pelajar itu dan hendaklah disalinkan kepada Pendaftar.

25.(1) Majlis Eksekutif sesuatu badan pelajar hendaklah memecat mana-mana ahli yang tidak lagi layak memegang jawatan atau menjadi ahli dari jawatan atau keanggotaan badan pelajar itu atau mana-mana jawatankuasa *ad hoc* dan hendaklah memaklumkan tindakan itu kepada Pendaftar secara bertulis.

(2) Kecuali sebagaimana diperuntukkan dalam subperenggan (1), badan pelajar itu atau Majlis Eksekutifnya tidak mempunyai apa-apa kuasa untuk memecat mana-mana pelajar yang memegang apa-apa jawatan dalam Majlis Eksekutifnya atau keanggotaan mana-mana pelajar yang menjadi ahli badan pelajar kecuali dengan kelulusan Timbalan Naib Canselor.

26. Jika seorang pelajar tidak lagi layak memegang apa-apa jawatan dalam, atau menjadi ahli bagi sesuatu badan pelajar atau bagi mana-mana jawatankuasa *ad hocnya*, ia hendaklah segera memberitahu secara bertulis kepada Setiausaha badan pelajar itu, dan hendaklah disalinkan kepada Pendaftar.

27. (1) Jika sesuatu badan pelajar memohon kepada Naib-Canselor untuk membentuk suatu jawatankuasa *ad hoc* badan pelajar itu di bawah subseksyen 57(7) Perlembagaan Universiti sebagaimana dikuatkuasakan terhadap badan-badan pelajar oleh subseksyen 58(2) Perlembagaan Universiti, permohonan itu hendaklah dibuat secara bertulis dan hendaklah dihantar melalui Timbalan Naib Canselor.

(2) Sebelum menghantar permohonan di bawah subperenggan (1) kepada Naib Canselor, Timbalan Naib Canselor hendaklah menjalankan siasatan yang difikirkannya perlu dan, kemudiannya, mengemukakan permohonan itu bersama dengan syor-syornya kepada Naib Canselor.

(3) Keputusan Naib Canselor mengenai sesuatu permohonan untuk membentuk suatu jawatankuasa *ad hoc* badan pelajar hendaklah disampaikan kepada badan pelajar itu melalui Timbalan Naib Canselor, dan jika Naib Canselor meluluskan pembentukannya ia boleh menyatakan had-had dan syarat-syarat yang tertakluk kepada kelulusan yang diberi.

(4) Pendaftar hendaklah menyenggara suatu daftar jawatankuasa-jawatankuasa *ad hoc* badan-badan pelajar.

(5) Peruntukan-peruntukan di perenggan 23 hendaklah terpakai *mutatis mutandis* bagi pemegang jawatan atau ahli sesuatu jawatankuasa *ad hoc* badan pelajar.

28. Pendaftar hendaklah menyenggara suatu rekod semua butir dan perkara yang dimaklumkan kepadanya di bawah Statut ini.

BAHAGIAN V

AM

29. Timbalan Naib Canselor boleh menjalankan apa-apa kuasa, melaksanakan apa-apa fungsi atau menyempurnakan apa-apa tugas Pendaftar di bawah Statut ini.

30. Jika Pendaftar dikehendaki di bawah Statut ini menghadiri atau mengawasi sesuatu mesyuarat badan pelajar atau mesyuarat Majlis Eksekutif atau jawatankuasa *ad hoc* badan pelajar, ia boleh memberi kuasa kepada mana-mana kakitangan Universiti di bawah kawalan pentadbirannya untuk menghadiri atau mengawasi mesyuarat itu bagi pihaknya.

31. Jika badan pelajar, atau Majlis Eksekutifnya, atau mana-mana jawatankuasa *ad hoc* badan pelajar, atau mana-mana pemegang jawatan atau ahli badan pelajar, tidak mematuhi apa-apa kehendak, arahan atau petunjuk Naib Canselor, Timbalan Naib Canselor atau Pendaftar di bawah Statut ini, Timbalan Naib Canselor boleh mengemukakan suatu laporan kepada Naib Canselor dengan apa-apa syor yang difikirkannya patut dibuat dan Naib Canselor boleh, setelah mempertimbangkan laporan dan syor-syor tersebut, membubarkan badan pelajar itu di bawah perenggan 15 atau mengarahkan supaya seseorang pelajar tertentu berhenti menjadi ahli atau memegang jawatan badan pelajar itu, atau beliau boleh memberi apa-apa arahan lain yang difikirkannya sesuai.

32. Statut Universiti Malaya (Badan-Badan Pelajar) 1979 adalah dibatalkan.

Dibuat 9 Disember 2024

SULTAN NAZRIN MUIZZUDDIN SHAH IBNI
ALMARHUM SULTAN AZLAN MUHIBBUDDIN SHAH AL-MAGHFUR-LAH
Canselor
Universiti Malaya